

第三八九冊

明倫彙編

人事典

名字部

稱號部

喜怒部

憂樂部

悲歡部

恐懼部

疑惑部

錯悞部

癖嗜部

諱忌部

悔悟部

迷忘部

含忍部

豎

(卷)

四

五

五

五

五

五

五

五

古今圖書集成

中華書局影印

古今圖書集成

中華書局影印



欽定古今圖書集成明倫彙編人事典

第四十四卷目錄

名字部雜錄

人事典第四十四卷

名字部雜錄

尚書大禹謨曰若稽古大禹曰文命敷於四海按注文命史記以爲禹名蘇氏曰以文命爲禹名則敷於四海者爲何事耶

禮記曲禮大夫七十自稱曰老夫於其國則稱名按注己國稱名者父母之邦不敢以尊者自居也

少儀聞始見君子者辭曰某固願聞名於將命者罕見曰聞名又警曰聞名

楚辭朕皇考曰伯庸肇錫予以嘉名

神仙傳或云老子欲西度關關令尹喜知其非常人也從之問道老子驚怪故吐舌聃然遂有老聃之號亦不然也今按九變及元生十二化經老子未入關時固已名聃矣老子數易名字非但一聃而已所以爾者按九宮及三五經及元辰經云人生各有厄會到其時若易名字以隨元氣之變則可以延年度厄今世有道者亦多如此老子在周乃三百餘年二百年之中必有厄會非一是以名稱多耳

小名錄何靖小名稱與高祖諱同改稱小字今傳稱向彌是也

續博物志宋齊丘乃字超回不自量如此孟軻莊周其字不傳或云軻字子與周字子休皆後人意取耳庚桑名楚史記作尤桑

夏棘字子棘爲湯大夫列子作夏莘

玉泉子會昌末年忽改御名爲火下大及宣宗以光王龍飛於古文光字實從火焉噫先兆之明若是耶尚書故實高祖太武皇帝本名與文皇帝同上一字後乃刪去嘗有碑版鑿處具在

北夢瑣言唐張弼與韋相保衡有分韋列於同列以其名楊弼訓祖衣也又詩云載衣之楊弼即小兒襁衣乃綳帶也方欲因事改之未聞韋相流貶竟不大拜韋常問立名之由弼以少孤爲無學問親表所誤也後唐姚相名迥近侍郎戲之曰迥訓肉汁胡爲名迥無以酬之然迥亦訓至雖然古人以名貽諍者多矣訪事者有焉至如仙客仙童齊丘用礪希敦大過亦無取焉其復名須依義訓唯單名易諱者善矣

揮塵前錄王絲字敦素越之蕭山人景祐初爲縣令會歲歉絲每家支錢一千以濟之期以明年夏輪絹一匹邑人大受其惠稱爲德政緣此當路薦之蓋是時一縑售價不逾其數而止止郎曹典州而已范文正公爲作墓誌具載其事王荆公當國倣其法施之天下號爲和買久之本錢既不復償且有折帛之害世誤傳始於王儀仲素儀仲文正公之子早即貴達未嘗爲邑官至八座沒諡懿敏國史本傳可考其子肇字定國與東坡先生遊李定字仲求洪州人晏元

獻公之甥文亦奇欲預養神會而蘇子美以其任子距之致與大獄梅聖俞謂一客不得食覆鼎傷衆實者也其孫即商老彭以詩名列江西派中又李定字資深元豐御史中丞其孫方叔正民兄弟皆顯名一時揚州人又李定嘉祐治平以來以風采聞嘗遍歷天下諸路計度轉運使官制未行老於正卿乃敦老如國之祖蓋濟南人也同姓名者凡三人世亦多指而爲一不可不辨

歐陽文忠公父名觀文多避之如葬落碑在蔣州龍興宮之類蘇東坡祖名序文多云云引或作叙近爲文者或做此不知兩先生之意也

揮塵後錄李邵卿名諸子名世人難曉後見孫長文云邵卿之長子壽朋取三壽作朋之義次子復圭本三復白圭幼子德獨以三德並稱其指如此宜乎人所不解也

而府元龜東晉侯謙寶卷字智藏本名賢明帝輔政後改焉論者曰名以行義往賢垂範備而之禪衛士識之東晉已悉矣藏以終之其兆先微蓋天所命矣其麓漫抄文士輒不顧道理有甚害義者孔平仲雖說載陳侗陳汝義同在禮院爲博士職掌宗室被祭每一次得絹五十疋見一老宗室入朝在路指視曰此較材也我當得之二人相事它日見有聯騎造朝者則又曰此皆較材也我當得之豈有活人遽欲得財而顧其死仁人固如是乎宗籍凡祖免親以上賜名受官有親兄弟名十揭士世士崑士綴者乃寓不典之言於其間又有失之綴之亦此義也其它令誅令餘等不可舉舉後又取怪僻字但欲爲戲笑至

於撰字行尤當致思使與國姓無妨如不字連國姓固不美矣故皆以惡字綴之不妄等是也然不亦謂其詩曰不顯文王言甚顯文王則不妄爲甚矣得乎高宗行實爲不字而孝宗從別派入近又撰與字若字必字亦非可連國姓人無言者不獨此耳徽宗書間曰敷文取帝乃義敷文德舞千羽於兩階七旬有苗格以寓諷諫其刻薄不遜如此

古之聖王諱世皆不知避有一時舉起且僞僞之主至今諱而不改者如昭穆本作昭穆讀以晉文帝諱改呼郃城避朱梁諱改曰州如東都州南州北州是也代字本作茂以李唐諱改云武或曰務浙人避錢氏諱改刻爲金果有石樞呼曰金樞江東人以楊行密諱呼密爲蠶糖太乙十神有若基氏基避唐明皇諱改作基至今不改本草有著預避唐代宗諱改云舊藥避英宗諱又改爲山藥則與舊預似不相干今當云山預可也

石林燕語禮述事父母則諱王父母不違事父母則不諱王父母鄭氏以違爲及識當是有知之稱舊法祖父母私忌不爲假元豐編勅修假尊令於父母私忌暇下落入述事祖父母者准此意謂生時祖父母尚存云爾然不當言述事蓋誤用禮之文也原爲此法者謂生而祖父母死則爲不假存則爲假所以別於父母也若謂述事爲及見之辭則禮云不違父母者今遺腹子固有不及見父者矣而母則安有不及見者乎法初行安厚卿爲樞密通祖母忌祖母沒時厚卿纔一歲疑而以問禮部郎官何洵直洵直雖知法官之誤因欲還就其說引于生三月而父名之以

爲天時一變爲有識欲以三月爲限斷過矣今士大夫凡生而祖父母存者皆告假從立法者之意也齊東野語古今避諱之事雜見諸書今漫集數條於此以備攷覽蓋殿以前尚質不諱名至周始諱然猶不盡諱如穆王名滿定王時有王孫滿之類至秦始皇諱政乃呼正月爲征月史記年表作端月盧生曰不敢端言其過秦頗端正法度曰端直皆避政字漢高祖諱邦舊史以邦爲國惠帝諱盈史記以萬盈數作滿數文帝諱恆以恆山爲常山景帝諱啓史記微子啓作微子開漢書啓母石作開母石武帝諱徹以徹侯爲通侯刪徹爲制通宣帝諱詢以苟卿爲孫卿元帝諱奭以奭氏爲盛氏光武諱秀以秀才爲茂才明帝諱莊以老莊爲老嚴莊助爲嚴助十莊爲十嚴傷帝諱隆以隆慮爲林慮安帝諱慶以慶氏爲賀氏魏武帝諱操以杜操爲杜度蜀後主諱宗以孟宗爲孟仁晉景帝諱師以師保爲保傳京師爲京都文帝諱昭以昭穆爲昭穆昭君爲明君三國志韋昭爲韋耀惠帝諱業以建業爲建康康帝諱岳以鄧岳爲鄧岱山岳爲山岱齊太祖諱道成薛道淵但言薛淵梁武帝小名阿練子孫皆呼練爲白絹隋帝諱忠凡郎中皆去中字侍中爲侍內中書爲內史殿中侍御爲殿內侍御置侍郎不置郎中置御史大夫不置中丞以待書御史代之中廬爲次廬至唐又避太子諱亦以中郎爲旅賁郎將中書舍人爲內舍人煬帝諱廣以廣樂爲長樂廣陵爲江都唐世宗諱諤丙故以景字代之如景科景令景子之類是也唐祖諱虎凡言虎率改爲猛獸或爲武如武貴武林之類李延壽

作南北史易石虎爲石季龍韓擒虎爲韓擒高祖諱淵趙文淵爲文深淵字盡改爲泉劉淵爲元海戴淵爲戴若思太宗諱世民唐史凡言世皆曰代民皆曰人如今人治人生人富人侯之類民部曰戶部高宗諱治凡言治皆曰理如至理之主不代出者章環避當時諱也陸贄曰與理同道罔不與脅從罔理韓元策問堯舜垂衣裳而天下理又無爲而理者其舜也歟唐宗諱旦張仁奭改人恩元宗諱隆基太一君基與臣基並改爲其字隆州爲閬中隆康爲晉康隆龜爲崇龜隆山郡爲仁壽郡代宗諱豫以豫章爲鍾陵蘇預改名源明以薯蕷爲薯及山藥德宗諱适改括州爲處州憲宗諱淳淳州改爲樂州韋純改名貫之之純改名處厚王純改名紹陸純改名執柳淳改名濯嚴純改名休復李行純改名行謹崔純亮改名行範程純改名弘馮純敏改名約穆宗諱恆以恆山爲常山敬宗諱弘徐弘敏改名有功

帝諱昆宋緄會要作宋混鄭涵避文宗舊諱改名泚武宗諱炎賈炎改名嵩宣宗諱忱忱書諱改名損穆諱改名仁裕後梁太祖父烈祖名誠遂改城曰瞿晉高祖諱敬瑭析敬字爲文氏苟氏至漢乃復舊至本朝避龔祖諱復析爲文爲苟本朝高宗諱構避嫌名者仍其字更其音者勾濤是也加金字鉤光祖是也加絲字絢紡是也加草頭者苟謹是也改爲勾字者句思是也增勾龍者如淵是也勾龍去上一字者大淵是也已上皆臣下避君諱也

吳太子諱和以和與爲嘉興唐高宗太子弘爲武后所耽追尊爲孝敬帝廟曰義宗弘文館改爲昭文弘

農縣爲恆農諱弘機但爲機李含光本姓弘易爲李
曲阿弘氏易爲洪溫彥弘遂以大雅字行晉以毗陵
封東海王世子毗以毗陵爲晉陵唐避章懷太子賢
諱改集賢爲崇文館之類皆避太子之諱也

呂后諱雉封禪書謂野雞夜鳴武后諱嬰以詔書爲
制書鮑照爲鮑昭改懿德太子重照爲重潤劉思照
爲思昭簡文鄭后諱阿春以春秋爲陽秋富春爲富
陽斬春爲斬陽此避后諱也

元后父諱崇以崇中爲省中武后父諱華以華州爲
太州韋仁約避武后家諱改名元忠寶懷貞避韋后
家諱而以字行劉穆之避王后諱以憲祖字行後復
避桓溫母諱遂稱小字武生虞茂避穆后母諱改名
預本朝章憲太后父諱通嘗改通直郎爲同直郎通
州爲崇州通判爲同判通進司爲承進司通奉爲中
奉通事舍人爲宣事舍人至明道間遂復舊此則避
后家諱也

錢王鏐以石榴爲金櫻改劉氏爲金氏楊行密據揚
州州人呼鏐爲蜂糖趙避石勒諱以羅勒爲蘭香高
祖父名誠以武成王爲武明王武成縣爲武義縣羊
祐爲荊州州人呼戶曹爲辭曹之類皆避國主諸侯
諱也

詩書則不諱若文王諱昌而箕子陳洪範曰使羞其
行而邦其昌厲王諱胡而宣王時詩曰胡不相畏胡
爲虺蜴胡然厲矣周禮有昌本之俎詩有齊發之詠
大誥弗棄基不諱后稷棄字孔子父叔梁紇而春秋
書臧孫紇成王諱誦而吉甫作誦之句正在其時是
也

臨文則不諱魯莊公名同而春秋書同盟襄公名午
而書陳侯午卒僖公名申書戊申定公名未書宋人
宋仲幾漢書祀元封詔書有啓母石之言刑註志建
三典以刑邦國與萬邦作孚韋孟詩總齊羣邦皆不
避高祖諱魏太祖名操而陳思王有造白之何曹志
植之子奏議云幹植不强三國吳時有言功以權成
蓋斥孫權之名南史有寧逢五虎及虎視之語則虎
字亦不盡避韓文潮州上表云朝廷治平日久曰政
治少懈曰魏巍治功曰君臣相戒以致至治舉張行
素云文學治行衆所推亦不避高宗之諱又袁州上
表曰顯榮類煩舉章顯曰顯映班序柳文樂曲曰義
和顯耀兼清芬皆不盡避中宗之諱韓賀正位表曰
以和萬民亦不諱民字如此類甚多胡翼之侍諱延
英日講乾卦元亨利貞上爲動包徐曰臨又不諱伊
川講南容三復白圭內侍告曰容字上舊名也不聽
講畢曰昔仁宗時宮嬪謂正月爲初月餅之蒸者爲
炊天下以爲非嫌名舊名請勿諱

邦國有不諱者襄王名鄭而鄭不改封至於出居其
國使者告於秦晉曰鄭在鄭地受晉文公朝而鄭伯
傳漢和帝名肇而郡有京兆是也
嫌名則有避有不避者韓退之辨諱桓公名白傳有
五皓之稱厲王名長琴有修短之日不開謂布帛爲
布皓腎腸爲腎修漢武名徹不聞諱車轍之轍然史
記天官書謂之車通此非諱車轍之轍乎若晉康帝
名岳鄧岳改名爲嶽此則不諱嫌名也
二名不偏諱唐太宗名世民在位日戴胄唐儉爲民
部尚書虞世南李世勣皆不避至高宗時始改民部

爲戶部世南已卒世勣去世字或云卒哭乃諱
避諱而易字者按東觀漢記云惠帝諱盈之字曰滿
文帝諱恂之字曰常光武諱秀之字曰茂云云蓋當
時避諱改爲其字之者變也如封雙父日之也宋朝
眞宗諱恆者胡登切若闕其下畫則爲恒又犯徽宗
旁諱後遂併恒字不用而易爲常正用前例也

淮南王安避父諱長故淮南書凡言長悉曰修王義
之父諱正故每書正月爲初月或作一月餘則以政
字代之王舒除有稽內史以祖諱會以會稽爲鄞稽
司馬遷以父諱諱史記中趙談爲趙同子張孟談爲
孟同范賜父名奉後漢書郭泰爲郭太李膺祖父名
整今故爲文皆以今爲茲杜甫父名閑故杜詩無閑
字蘇子瞻祖名序故以序爲叙或改作引會營公父
名魯故避之者以助會爲勸當蔡京父名滄改平準
務爲平貨務此皆士大夫自避家諱也
史記李斯傳言宦者韓談則談字不能盡避漢書爰
盎傳有上益莊之文鄭當時傳有鄭莊千里不齋糧
之類此不能盡避也
范曄爲太子詹事以父名泰固辭朝議不許唐實會
授中書舍人以父名至忠不受議者以音同字別乃
就職韋牟遷視書郎以父嫌名換司議郎柳公綽遷
吏部尚書以祖諱換左丞李涵父名少康爲太子少
傅呂渭勅之宋朝呂希純以父名公著而辭著作郎
官鄭公父名言而不辭有正言韓億絲織家諱保樞
皆爲樞密而不避此除官有避不避也
至若後唐郭崇毅父名弘以弘文館爲崇文館建隆
間華客彥劉吳廷祚皆拜使相而劉父名章廷祚父

名璋制麻中爲改同爲中書門下平章事爲二品給
典中沈守約湯進之二丞相父皆名舉於是改提舉
書局爲提領此則朝廷爲臣下遊系諱也

元顏以陽城驛與楊道州名同更之曰遊賢驛且作
詩以記之曰樂天和之云荆人愛羊祜戶曹改爲詞
一字不忍道況兼姓呼之是也鄭誠過鄧州浩然亭
謂賢者名不可斥更名孟亭款有任昉寺任昉村以
任所遊之地故也虞藩爲刺史日更爲任公寺任公
村此則後人避前賢名也

至有君臣同名者曩王名鄭衛成公與之同時亦名
鄭衛侯諱惡其臣有石惡宋武帝名裕裕叔度王敬
弘皆名裕之謝景仁張茂度皆名裕宋明帝名彧王
景文亦名彧唐元宗名隆基劉子元名知幾

又有父子祖孫同名者周康王名釗生子瑕是爲昭
王宋明帝名彧其子後廢帝亦名彧魏獻文名弘其
子孝文名宏聲雖相近而字猶異也若周厲王名胡
而僖王名胡齊蔡文侯昭侯相去五世皆名中執安
同父名屈同之子亦名屈襄陽有處士羅君墓誌曰
君諱靖父諱學優不仕此尤爲可罪也

若桓元呼父溫曰清此不足責若韓愈不避仲卿又
何耶

朱溫之父名誠以其類戊字司天監上言請改戊己
之戊爲武字此全無義理如揚都士人名審沈氏與
書名而不姓皆諱之者過耳未如梁謝舉聞家諱必
哭近世如趙南仲亦然此亦不失爲孝若唐裴德融
父諱卓高備爲禮部侍郎與員外郎德融人試錯曰伊
父諱卓而某下就試與及第田一生事後降屯田員

外郎與同除一人參右丞盧簡盧先屈前一人使驅
使官傳語曰員外是何人下及第偶有事不得奉見
裴倉遽而去李賀以父名晉肅終身不起進士舉抑
又甚焉崔殷夢知舉吏部尚書歸仁晦託弟仁澤殷
夢雖唯至于三四殷夢飲色端笏曰某見進表讓此
官矣仁晦始悟已姓乃殷夢家諱龜從故也後唐天
成中盧文紀爲工部尚書郎中于鄴參文紀以父名
嗣業與同音竟不見鄴憂畏太過一夕雉經而死楊
行密父名愆與夫同音改文散諸大夫爲大卿御史
大夫爲御史大卿至有與唐寺鐘題誌云金紫光祿
大卿御史大及銀青光祿大皆直去夫字尤爲可怪
國朝劉溫叟父名榮終身不聽絲竹不遊俗嵩徐績
父名石平生不用石器遇石不踐遇橋則令人負之
而過此皆避諱不近人情者也

至如唐憲宗時戎昱有詩名京兆尹李鑾擬以女嫁
之令其改姓昱辭爲五代有石昂者讀書好學不求
仕進節度使符習高其行名爲臨淄令習入朝監軍
楊玄明知雷後昂以公事上謁贊者以彥明家諱石
遂更其姓曰右昂昂趨於庭責彥期曰內侍奈何以
私害公昂姓石非右也彥明乃怒昂即解官去語其
子曰吾本不欲仕亂世果爲刑人所辱宜和中徐申
幹臣自諱其名知常州一邑宰曰事言已三狀申府
未施行徐怒形於色責之曰君爲縣宰豈不知長吏
名乃作意相侮宰亦好犯上者即大聲曰今此事申
府不報便當申監司否則申戶部申臺省申來申
去直待身死即休語罷長揖而退徐雖怒然無以罪
之三人者皆不肯避權貴之諱以自保其姓名若北

齊熊安生者將通名見徐之才和士開二人相對以
之才諱雄士開諱安乃稱觸生羣公晒之蔡京在相
位日權勢甚盛內外官司公私皆避其名如京東京
西並改爲畿左畿右之類蔡門下昂避之尤謹併禁
其家人犯者有咎責昂嘗自誤及之家人以爲言乃
舉手自擊其口蔡經國聞京閩音稱京爲經乃奏乞
改名純臣此尤可笑紹聖間安惇爲從官章惇爲相
安見之但稱享而已近世方巨山名岳或諉其爲南
仲丞相幕客趙父名方乃改姓爲方既而又爲丘山
甫端明屬丘名岳於是復改名爲方山遂止以爲過
焉善乎胡康侯之論曰後世不明春秋之義有以諱
易人姓者易人姓名者愚者迷禮以爲孝詔者獻佞以
爲忠忌諱繁名實亂而春秋之法不行矣

夢溪筆談予家有閩博陵畫唐秦府十八學士各有
真贊亦唐人書多與舊史不同姚東字思廉舊史姚
思廉字簡之蘇臺陸元明薛莊唐書皆以字爲名李
元道蓋文達于志寧許敬宗劉孝孫蔡允恭唐書皆
不書字房元齡字喬年唐書乃房喬字元齡孔穎達
字穎達唐書字仲達蘇軾名從日從九唐書乃從
日從助許敬宗薛莊官皆直記室唐書乃攝記室蓋
唐書成於後人之手所傳容有訛謬此乃當時所記
也以舊史考之魏鄭公對太宗云目如懸鈴者佳則
元齡果名非字也然蘇世長太宗召對真武門問云
卿何名長意短後乃爲學士似爲學士之時方更名
耳
綱素雜記新序云平公浮西河中流而歎曰嗟乎安
得賢士與此樂者乎固桑進曰君言過矣夫創產於

越珠產江漢玉產崑山此三寶者皆無足而至平公曰固桑來吾門下食客三千人朝食不足暮收市租

暮食不足朝收市租吾尚可謂不好士乎對曰今夫鴻鵠高飛冲天然其所恃者六翮耳夫腹下之囊背上之毛增去一把飛不為高下不知君之食客六翮

上之毛增去一把飛不為高下不知君之食客六翮那將腹背之毛囊也平公默然不應余按說苑云趙簡子游於西河而樂之歎曰安得賢士而與處焉舟

人古乘跪而對曰夫珠玉無足去此數千里而所以能來者人好之也今士有足而不能來者吾君其不

好之乎簡子曰吾門左右客千人朝食不足暮收市征暮食不足朝收市征吾尚可謂不好士乎古乘對

曰鴻鵠高飛遠翔其所恃者六翮也背上之毛腹下之囊無尺寸之數去之滿把飛不能為之益卑益之

滿把飛不能為之益高不知門下左右客千人者有六翮之用乎將盡毛囊也按新序說苑皆劉向所撰

也新序作平公說苑作趙簡子新序作固桑說苑作古乘何異同如此又說苑第一卷載楚文王爵饒饒

事而新序文王作恭王堯饒作堯蘇又班固古人表云晉船人固來顏師古曰即固乘也又爾不同何邪

晉書周顗傳云顗弟嵩嘗因酒瞋目謂顗曰君才不及弟何乃橫得重名以所然蠟燭投之顗神色無忤

徐曰阿奴火攻固出下策耳又案紹秀傳云嘗冬至置酒紹秀舉觴謂三子曰吾本渡江託足無所不謂

爾等並貴列吾目前吾復何憂嵩起曰恐不如尊旨伯仁志大而才短名重而識闇好來人之弊此非自

全之道嵩性抗直亦不容於世唯阿奴碌碌當在阿母目下耳阿奴謨小字也觀世說所載正與此同注

云阿奴周謨也然則投燭之事當云阿嵩火攻固出下策耳其稱阿奴蓋史誤也

晉庾敳傳云敳有重名為縉紳所推而頗聚斂積實談者議之都官從事溫嶠嘗劾奏敳更器嶠曰嶠

森森如千丈松雖磊砢多節施之大廈有棟梁之用而溫嶠傳曰嶠為都官從事散騎常侍庾敳有重名

而頗聚斂嶠舉奏之京都震肅蓋是時溫嶠為都官從事敳為散騎常侍二人同在朝廷是散之所器者

溫嶠非和嶠明矣又觀和嶠傳又云從事中郎庾敳見而歎曰嶠森森如千丈松雖磊砢多節目施之大

廈有棟梁之用而世說亦云子嵩日和嶠云云何其謬歟良由修史者雜出於諸儒而非一人之筆故其

謬戾如此今之學者至有云和氏之松千丈而益謬矣

歐陽五代史作拓跋思敬意謂薛史避國諱耳按舊唐書實錄皆作思恭實錄天復二年九月武定軍節

度使李思敬以城降王建思敬本姓拓跋即夏節度使思恭保大節度使思孝之弟也思孝致仕以思敬

為保大留後遂陞節度使武定軍新唐書黨項書曰思孝為定難節度使卒弟思諫代為節度使思孝為

保大節度以孝薦弟思敬為保大留後俄為節度使然則思恭思敬乃是兩人思敬後附李茂貞因賜國

姓故更姓李文忠公合為一人誤也

歸田錄云宋鄭公庠初名郊字伯庠與其弟祁曰布衣時名動天下號為二宋其為知制誥仁宗驟加獎

祥仁宗越命改之公快快不獲已乃改為庠字公序公後更襲二府一十餘年以司空致仕兼享福壽而

終而壽者竟不見用以卒可以為宵小人之重戒也又西清詩話云宋元憲公始拜內相同列謂其姓宋

而郊名非便公舉諡更名庠意殊快快不滿會用新名秘書某進卿乃呼同年某戲答公曰清臣宋郊勝

第六中選徧閱小錄無宋庠者不知何許人公因奇一絕自解云紙尾勤勤問姓名禁林依舊玷華纓莫

驚書錄題臣向只是當時刻更生又楊文公談苑云太平興國四年北戎寇邊車駕幸大名府方渡河有

人持手板進乘輿前驅斥之號呼道旁自言獻封事太宗令接取視之乃臨河主簿宋捷上甚喜即以

將作監此乃以姓名盜爵祿者也此與元憲公姓同而事異具可噴笑

沈存中言謂子家有閭博陵唐書唐秦府十八學士各有真贊名字與史所載不同或以字為名或書名而

不書字者其論甚美然謂房與齡字喬年舊史乃云房喬子與齡既而云唐書成於後人之手所傳客有

訛謬甚矣也未云以舊史考之魏鄭公對太宗曰目如懸鈴者佳則與齡果名非字也何其謬歟蓋所謂

懸鈴者乃鈴鐸之鈴而與齡乃年齡之齡唯其為年齡之齡故字以喬年此理甚明而存中乃不之省何

也然房梁公名字大抵不同與贊云房與齡字喬年舊史云房喬字與齡而新史云房元齡字喬年未詳

也又韓愈集中有王弘中神道碑云諱弘中字某按實錄新舊傳皆名仲舒字弘中愈又作某喜亭記序稱為王弘中然則弘中必字也碑文誤耳政與房喬

名字一同

宜齊野乘唐人多有稱人名者詩中惟甚今人學唐詩者多倣之不知其不可仿記李習之答梁載言書云孟子曰天下之達尊三德爵年惡得有其一以慢其二足下之書章君詞楊君潛足下之德與二君未知先後也足下齒幼而位卑而皆名之傳曰吾見其與先生並行也觀習之之言則當時亦以稱前輩名為非妨謂古者君稱臣名父兄稱子弟名師稱弟子名禮疏云名者職賤之稱仲尼於弟子外不敢稱人名曾子稱子夏之名蓋因于夏稱無罪怒而責之也常考桓公四年夏天王使伯糾來聘注禮君於臣而不名者五諸父兄不名詩云王曰叔父是也子大夫不名祭伯是也盛德之士不名叔胥是也老臣不名宰渠伯糾是也如桓二年及其大夫孔父十七年蔡季自陳歸莊三年紀季以鄙人於齊閔元年季子來歸傳十六年公子季友卒公羊曰何以不名賢也閔二年齊與于來盟公羊曰何以不名喜之也又白虎通曰王者臣有不名者五先王老臣不名與先王戮力共治者尊而不名尚書曰咨爾伯不言名也不名者貴賢者而已故呂望郭子儀俱稱尚父管夷吾稱仲父裴叔稱裴監魏晉以來多有贊拜不名者以人主之待臣子猶爾况常人乎

玉照新志本朝有兩張先者字子野一則樞密副使邊之孫與歐陽文忠同在洛陽幕府其後文忠為作墓誌銘稱其志守端方臨事敢決者一與東坡先生遊東坡推為前輩詩中所謂詩人老去驚為在公子歸來燕燕忙能為樂府號張三形者有兩張世美一

東坡作哀詞者一蘇丞相子名京二人皆知名士也可談王介甫居金陵作謝墩詩云我名公字偶相同我屋公墩在眼中公去我來墩屬我不應墩姓尚隨公蓋晉謝安故地也謝字安石介甫名安石

曲消舊聞政和初凡人名或字中有天字君字主字聖字王字皆令避而不用蓋從趙野所請也當時如寺觀僧道所稱王字亦行改正或曰此不祥也已而果然

筆記陶穀本唐諫後石晉時避帝諱改曰陶後納唐氏為塔亦可怪

西溪叢語封德彝名倫房元齡名喬高士廉名儉顏師古名籀而皆云以字行顏之推云古者名終則諱之字乃以為子孫江北士人全不辨之名亦呼為字字固為字顏師古刊謬正俗云或問人有稱字而不稱名何也顏師古考諸典故故以稱名為是顏師古立論如此而乃以字行不可曉也

青箱雜記太祖廟諱匡引語訛近香印故今世賣香印者不敢斥呼鳴羅而已仁宗廟諱徽語訛近蒸今內庭上下皆呼蒸餅為炊餅亦此類

錢武肅王諱鏐至今吳越間謂石樞為金樞劉家留家為金來田家留住為駐住又楊行密據江淮至今民間猶謂蜜為蜂糖滁人猶謂行溪為菱溪則俗語承譌久未能頓易故也

劉溫叟父名岳終身不聽樂不遊嵩華每赴內宴聞鈞奏則回號泣移時曰若非君命則不至於是此與唐李賀父名晉肅賀不敢舉進士事頗相類

嶺南風俗相呼不以行第唯以各人所生男女小名

呼其父母元豐中余任大理丞斷賓州奏案有民韋超男名首即呼韋超作父首韋邀男名滿即呼韋邀作父滿韋全女名插娘即呼韋全作父插韋庶女名睡娘即呼庶作父睡妾作嬌睡

墨客揮犀楊行密之據揚州民呼蜜為蜂糖夫蜜密一音也呼吸不同字體各異亦猶茄子伽子之義甚哉南方之好避諱者如此

嬪真子同年小錄載小名小字或問有故事乎或曰始於司馬大子僕曰不然離騷經曰皇覽揆予于初度兮肇錫予以嘉名名子曰正則分字子曰靈均且屈原字平而正則靈均則其小字小名也所謂皇者三閭稱其父也後人遂以皇覽為進御之書誤矣

晉史乃唐時文士所為但托之御撰耳天文志云天聰明自我民聰明以民為人且太宗不應自避其名又洛書乾曜度以乾為號則太宗又不應為太子承乾避名也以此足見乃當時臣下所為爾臣下之文駕其名於人主已為失矣而人主傲然受之而不辭兩胥失矣

陳水先生一私印曰程伯休甫之後蓋出於司馬遷傳曰重黎世序天地其在周程伯休甫其後也當宣王時官失其守而為司馬氏故陳水引用之耳伯休甫者其字也古字一字多矣如爰絲房喬顏縉之類三字無之獨本朝有劉伯貢父劉中原父或云二人本字貢父原父以犯高魯王諱故去甫而加伯中時人因并三字呼之此說非也六一先生作原甫墓誌云公諱敞字中原父姓劉氏熙寧元年四月八日卒以此可知彼但見錢穆甫以避諱人或呼為錢穆或

呼為穆四遂并二劉失之誤矣

古人姓名有不可解者文公十八年季文子云高陽氏有才于八人注云高陽顓頊帝號也八人其苗裔蒼舒隤敳檮杌大臨龐降庭堅仲容叔達注云此即垂益禹皋陶之倫庭堅皋陶字也然有可疑者文公五年楚滅六夢滅文仲聞六滅曰皋陶庭堅不祀忽諸注云六夢皆皋陶後也且既云庭堅即皋陶字則文仲不應既曰皋陶又曰庭堅也若據其意則皋陶庭堅又似兩人山谷老人名庭堅字魯直其義不可解或云慕季文子之逐莒僕故曰魯直

唐時前輩多自重而後輩亦尊仰前輩而師事之此風最為淳厚杜工部於蘇端薛復延簡薛華醉歌首云文章有神交有道端復得之名譽早又云坐中薛華善醉歌醉歌自作風格老一篇之中直呼三人之名想見當世士人一經老杜品題即有聲價故當世顧得其品題不以呼名為恥也近世士大夫老幼不復敦篤雖前輩詩中亦不敢斥後進之名而後進亦不復尊仰前輩可勝歎哉

鷄肋編太史公作伯夷傳但云伯夷叔齊孤竹君之二子也而論語音注引春秋少陽篇謂伯夷姓墨名允一名元字公信叔齊名智字公達夷齊諡也陸德明取之不知少陽篇何人所著今有此書否如趙岐謂孟軻字則未聞而李輪注蒙求引史記云字子與今觀史記則未嘗有劉孝標亦云子與困臧倉之訴五臣註為孟軻是也

愧郊錄律文有私諱冒榮之禁故四銓之法過磨勘階官之稱與三代諱相值者許其自陳授以次官謂

之寄理遂以繫之官稱之首珂按國朝著令諸稱避字諱者擬以次官元豐改官制或有或無於是元符今又附益之云授舊官歷考條令初無以二字入銜者厲世磨鈍之柄而下之人得以寄稱幸故之野亦明矣士習目睫恬不知怪開禧丙寅李夢預璧為小宗伯會課當選中奉大夫正其祖諱援故實自言不帶寄理詔從之繼參大政復遷中大夫而稱朝議大夫自若朝論以為得體然銓法迄今亦莫之改也

聞見後錄蜀於韋臯刻石文字後書臯名者必鐫其中僅可辨故宋子京書臯事云蜀人思之見其遺像必拜凡刻石者臯名者皆鐫去其文尊諱之近有白西南夷得臯授故君長牒於卑位下書若臯字復塗以墨如刻石者蓋臯花字也當時書石亦用前名後押之制非蜀人鑲其文尊諱之如本朝韓魏公書花字為成琦字復塗以墨尚可辨亦此體也

王莽令國中不得有二名又遣使諷單于為一名東漢士大夫以操節相高遇莽之事必唾也乃終其世謹一名之律何也

郭忠恕嘲聶崇義曰近貴全為聶攀龍即作聶雖然三箇耳其奈不成聶崇義曰吾不能詩姑以一言為謝勿笑有三耳全勝畜二心陳亞蔡襄亦云陳亞有心終是惡蔡襄無口便成衰王汾劉攽亦云早朝殿內須呼汝寒食原頭盡拜君故又嘲王觀云汝何故見賣觀曰賣汝直甚分文其滑稽皆可書也

司馬遷父名談故史記無談字改趙談為趙同范曄父名泰改郭泰鄭泰俱為太杜甫父名閑故詩中無閑字其曰鄰家閑不違者古本問不違會閑朱旗北

斗閑者古本北斗閑李開父名楚今故所為文皆以今為茲獨韓退之因李賀作諱辯持言微之說退之父名仲卿於文不諱也曹志為植之子其奏云幹不植疆不諱其父名也呂岱為吳臣其書云功以權成不諱其君名也

孔氏雜說漢孔安國字安國晉安帝名德宗字德宗恭帝名德文字德文會稽王名道子字道子乃至北史慕容紹宗馮子琮魏蘭根南史蔡興宗唐郭子儀辛京果戴休顏張孝忠尚可孤孟浩然顏見遠田承嗣田承緒張嘉貞字文華李嗣業皆以名為字

王羲之字徽之徽之子猷之王允之子晞之晞之子肇之王晏之子崑之崑之子隨之皆三世同用之字胡毋輔之子謙之吳隱之子瞻之顏悅之子愷之皆兩世同用之字

管仲謂之管敬仲出左傳閔公元年子產謂之子美出左傳襄公二十五年原憲字子思出史記張宗字諸君杜茂字諸公陳思傳記注施延字君子出後漢書四皓名氏鄉里可見者東園公姓園名秉字宣朝陳留襄邑人常居園中故號園公夏黃公姓崔名郭字少通齊人隱居修道號夏黃公陶潛作聖賢羣輔錄云出皇甫謐高士傳揚雄所稱李仲元者名弘出蜀秦密傳郎子真名樓嚴君平名尊出前史王貢兩

雖傳注伯樂姓孫名陽字伯樂秦穆公時人出杜子馬蹄疏莊周字子休出列子辛計然范蠡師也姓辛氏字子文或曰計研或曰計倪出史記索隱杜康字仲寧出魏武短歌行注楚狂接輿姓陸氏名通師曠字子野並出莊子疏伯夷姓墨名允字公信孤竹君

之子也叔齊名智字公達伯夷弟也夷齊諱也見論語疏引春秋少陽篇

貴耳集禮云私諱不出門二名不偏諱臨文不諱韓文公諱辯一論其說詳盡近年以來士大夫之避諱自避於來則可臨官因致人罪則未可趙清獻之父名不陋使客史整一漏處呼而問之答曰今次修了不漏遂歸客史趙文仲在楚趙倡家初至問其何來答云因求一椀飯方到此趙怒及其名又及其父名立斬之陳立道知軍國府有新司法饒州人初夢問其何往答云在安仁縣寓居徑入大榻於東廟屬史輒稱先世之名為司法旁皇失措即尋警而去楊煜之父名王休同鄉有老儒王休合改選郡吏不敢呈擬數年不調後鄭昭文當國始得改秩王立之父名蒙凡仕宦處必有一客史先言相見時切莫道及蒙字丁寧再三可怪習尚如此但未能各家目刊禮部韻略耳

游宦紀聞昔人有諱後生不可稱前輩表德此忠厚之至也然一時出於中心至誠未嘗深考字所以表德也古人以為美稱殷人以爲諱事神而後有字儀禮子祭父云取昭告於考伯某父稱子也子思子作中庸稱其祖曰仲尼曰云云袁盎之姪問盎曰絲能日飲幾何近世子由與坡公多言子瞻兄陳了齋師事龜山簡中稱中立先生非若今世俗既諱其名又諱其字也又今往往有台諱尊諱之語尤非是生曰名死曰諱載之禮經可嚴禮部韻載先帝廟諱曰諱今上皇帝御名只曰名稱生人名乃曰諱不辭之甚也

燕翼貽謀錄唐人重於避諱國初此風尚在劉溫叟以父名岳終身不聽樂部曲避監臨家諱尤甚太宗雍熙二年六月辛丑詔內外臣僚三代名諱止可行於己州縣長吏不得出家諱新授官職有家諱者除三省御史臺五品文班四品武班三品以上許準勅上言餘不在改諱之限然法令明載官稱犯高曾祖父諱冒居者有罪則是與此詔相反也豈非此詔既行之後人無廉恥習以成風故又從而禁之耶

容齋隨筆蜀本石九經皆孟昶時所刻其書淵世民三字皆缺蓋爲唐高祖太宗諱也昶父知祥嘗爲莊宗明宗臣然於存勳嗣源字乃不諱前蜀王氏已稱帝而其所立龍興寺碑言及唐諸帝亦皆半闕乃知唐之澤遠矣

容齋續筆周宣帝自稱天元皇帝不聽人有天高上大之稱官名有犯皆改之改姓高者爲姜九族稱高祖者爲長祖政和中禁中外不許以龍天君王帝上聖皇等爲名字於是毛友龍但名友葉天將但名將樂天作但名作句龍如淵但名句如淵衛上達賜名仲達葛君仲改爲師仲方天任爲大任方天若爲元若余聖求爲應求周綱字君舉改曰元舉程振字伯玉改曰伯起程瑀亦字伯玉改曰伯禹張讀字聖行改曰彥行蓋蔡京當國過絕史學故無有知周事者宣和七年七月手詔以昨臣僚建請士庶名字有犯天王君聖及主字者悉禁既非上帝名諱又無經據詔依不根貽譏後世罷之

不爲文武諱也宣王名誦而吉甫作誦之句正在其時厲王名胡而胡爲虺蜴胡然厲矣之句在其孫幽王時小國曰胡亦自若也襄王名鄭而鄭不改封至於出居其國使者告於秦晉曰鄭在鄭地受晉文公朝而鄭伯傳王唯秦始皇以父莊襄王名楚稱楚曰荆其名曰政自避其嫌以正月爲一月蓋已非周禮矣漢代所謂邦之字曰國盈之字曰滿徹之字曰通雖但諱本字而吏民犯者有刑唐太宗名世民在位之日不偏諱故戴胄唐儉爲民部尚書虞世南李世勣在朝至於高宗始改民部爲戶部世勣但爲勣韓公諱辨云今上書及詔不聞諱許乘饑惟宦官宮妾乃不敢言喻及機以爲觸犯此數者皆其先世嫌名也本朝尚文之習大盛故禮官討論每欲其多廟諱遂有五十字者舉場試卷小涉疑似士人輒不敢用一或犯之往往暗行黜落方州科舉尤甚此風殆不可革然太祖諱下字內有从木从勻者廣韻於進字中亦收張魏公以名其子而音爲進太宗諱字內有从耳从火者又有梗音今爲人姓如故高宗諱內从勻从口者亦然真宗諱从心从互音胡登切若缺其一畫則爲恒遂并恒字不敢用而易爲常矣

論語所記孔子與人語及門弟子并對其人間答皆斥其名未有稱字者雖顏冉高弟亦曰曰曰曰雍唯至閔子獨云子騫終此書無損名

士大夫除官於官稱及州府曹局名犯家諱者聽迴避此常行之法也李燾仁甫之父名中當贈中奉大夫仁甫請於朝謂當告家廟與自身不同乞用元豐以前官制贈光祿卿丞相頗欲許之予在西垣聞其

說爲諸公言今一變成式則他日贈中大夫必爲祿書監贈太中大夫必爲諫議矣法不可行遂止李愿爲江東提刑以父名中所部遂呼爲通議蓋近世率妄稱太中也李自稱只以本秩曰朝散黃通老資政之子爲臨安通判府中亦稱爲通議而受之自如容齋四筆新唐書溫大雅字彥弘弟彥博字大臨大有字彥將舊史不載彥博字它皆同三溫兄弟也而兩人以大爲名彥爲字一以彥爲名大爲字宰相世系表則云彥將字大有而博雅與傳同讀者往往致疑歐陽公集古錄引顏師魯制中書舍人彥將行齋表爲是然則惟彥博異耳故或以爲誤予少時因文惠公得歐率更所書虞恭公誌銘乃彥博也其名字實然後見大唐創業起居注大雅所撰其中云煬帝遣使夜至太原溫彥將宿於城西門樓上首先見之報兄彥弘馳以啓帝帝方臥聞而驚起執彥弘手而笑據此則三溫之名皆從彥而此書首題乃云大雅奉勅撰不應於其間敢自稱字已而詳攷之高宗太子弘爲武后所誅追尊爲孝敬皇帝廟曰義宗別於太廟故諱其名如弘文館改爲昭文弘農縣改爲恆農徐弘敏改爲有功韋弘機但爲機李含光本姓弘易爲李曲阿弘氏易爲洪則大雅之名後人追改之也顏魯公作顏勤禮碑叙顏溫二家之盛曰思魯大雅愍楚彥博遊秦彥將以雅爲名亦由避諱耳錢開詩在太學以此爲策問而言歐陽作傳戾於聞見彼蓋不察宋子京之作云

西漢名人如公孫弘董仲舒朱買臣丙吉王褒貢禹皆有異世與之同姓名者戰國策及呂氏春秋齊有

公孫弘與秦王孟嘗君言者明帝時又有幽州從事公孫弘交通楚王英英於廣庭傳高祖時又有謁者貢禹梁元帝時有武昌太守朱買臣尚書左僕射王褒後漢安帝時有太子廚監郗吉南齊武帝之子巴東王子響爲荊州刺史要直閣將軍董璠與同行璠曰殿下癡如雷敢相隨耶子響曰君敢出此語亦復奇癡上聞而不悅曰人名響復何容得璠藉乃改爲仲舒謂曰今日仲舒何如昔日仲舒答曰昔日仲舒出自私庭今日仲舒降自陛下以此言之勝昔遠矣然此人後不復見

容齋五筆檀弓云幼名冠字五十以伯仲周道也古之人命字一而已矣初日子已而爲仲爲伯又爲叔爲季其老而尊者爲甫蓋無以兩言相連取義若屈原離騷經名余曰正則今字余曰靈均案史記原字平所謂靈均者釋平之義以緣飾詞章耳下至西漢與周相接故一切皆然除子房子卿子孟子政子孺子長子雲子兄子眞子公子陽子賓子幼之外若仲孺仲卿仲子長卿少卿孺卿卿客卿游卿游翁卿聖卿長君少君穉君游君次君賴君近君曼君王孫翁孫次公少公孟公游公仲公長公君公少叔翁叔長叔中叔子叔長情曼情次情穉季長孺仲孺幼孺少孺次孺翁孺君孺長翁翁翁仲翁少翁君房君賓君情君敖君蘭君長君仲君孟少季少子少路少游穉賓穉圭穉游穉君巨先巨君長賓長房翁思翁子翁仲之類其義只從一訓極爲雅馴至於婦人曰少夫君俠政君君力君弟君之阿君單書一字者若陳勝字涉項籍字羽彭越字仲張歐吳廣枚乘字叔楚元

王字交朱雲字游靈盤字絲張釋之字季都當時字莊劉德字路駐弘字孟追東漢以下則不盡然愛日齋叢抄乾道間陸放翁取家藏前輩筆札刻石嘉州荔枝樓下名宋法帖予得其本有陳文惠書首云堯佐曰而後云希元再拜希元文惠字也自稱於書間不可解黃氏法帖刊誤云柳少師與弟帖末云誠懇早人多疑之以編注漢書丞相衡傳云字以表德豈人所自稱抑不當稱字然常觀逸少敬謝帖自云王逸少白廬山遠公集盧循與遠書自云范陽盧子先叩頭則古人稱字蓋或有之黃長曆精於攷古從其辨証如文惠稱字無疑矣揆漢書張晏注云匡衡少時字鼎長乃易字稚圭世所傳衡與貢禹書上言衡敬輟下言匡鼎自知是字也顏師古以爲張氏說穿鑿假有其書乃後人見此傳云匡鼎來不曉其意妄作衡書云鼎白爾字以表德豈人所自稱乎長春所引顏注謂此西京雜記云鼎衡小名也若文惠前名後字或取法漢人

禮檀弓幼名冠字五十以伯仲孔氏曰人始生三月而加名故云幼名年二十有爲人父之道同等不可復呼其名故冠而加字年至五十者又轉尊又捨其二十之字直以伯仲別之士冠禮二十已有伯某甫而言至五十直呼伯仲爾朱文公曰吾五十即稱伯仲除字下面兩字猶今人不取字等者呼爲幾丈之類是不可以字尊也玉藻士於君所言大夫不失則稱諡若字名與士大夫言名士大夫言於君前士名而大夫字字爲貴及與大夫言而字字爲尊矣馬永卿赴亳州未城簿初見劉器之諫議問曰王築安否

曰王學士安樂後劉公爲孫字言新主簿可見後生不稱前輩表德此爲得體重家訓曰故家惟吳氏羣居相處呼外姓尊長必曰某姓第幾叔若兄諸姑尊姑之夫必曰某姓姑夫某姓尊姑夫未嘗敢呼字也又云梁陽公外弟楊公韓環玕與他人語稱楊公但曰內兄或曰侍講未嘗敢稱字也舍人穆志云張正素先生子厚名學東萊公從表兄也長東萊公十餘歲與書未嘗呼字楊器之大夫名珪實萊陽公表弟於東萊尊行也與東萊公書亦未嘗呼字往時俗人有視楊應之學士爲尊行者在朝中呼應之應之回首不應萊陽公以應之當如卑不敢字尊尊固不得字卑也故呂進伯逐門客謂呼小子字豈可爲人師醺醉世變亦云字者朋友之職也昔見前輩不呼後進者要稱字以代名爲成人之禮尊者疑其斥之卑者且不敢當獨朋友無相尊卑可字也李文公答朱載堉論此書云古人相接有等輕重有儀如師之於門人則名之於朋友則字而不名稱之於師則雖朋友亦名之夫子於鄭兄事子產於齊兄事晏嬰平仲傳曰子謂子產有君子之道四焉又曰晏平仲善與人交子夏曰曾游過矣子張曰子夏云何曾子曰豈堂乎張也是朋友字而不名驗也兩朋友字而不名正孔子同等不可以名而加字者也顏氏家訓有云名以體正字以表德名終則諱之字乃可以爲孫氏孔子弟子記事皆稱仲尼呂后徵時常字高祖爲季至漢哀稱字其叔父曰絳王丹與侯霸字詡字霸爲君房江南至今不諱字也河北士人全不諱之名亦呼爲字字固因呼爲字向書王元景兄弟皆號名人

其父名雲字羅漢一皆諱之其餘不足怪也續家訓云魏常林年七歲父黨造門問林伯先在不何拜伯先父之字也林曰臨子字父何拜之有庾翼子爰嘗候孫盛見盛子放問曰安國何在放答曰在庾稚恭家蓋放子以爰客字父亦字其父王丹對侯曰上而字其父曰上不以爲嫌且字何以爲孫氏古尊卑通稱春秋書紀季姜蓋季者字也杜預曰書字者伸父母之尊以稱字爲貴也謂子諱父字非諱之也稱其父字於人之子子有所尊而不敢當宜也顏氏舉字可以詳荆公序石仲卿字以爲成人則貴而字之春秋二百四十二年以字而不名者十二人而已惟失其所以貴乃爾少也石林葉氏云孔子雖大司寇而但稱仲尼哀公諱之曰尼父仲山甫尹吉甫皆周之卿士而山甫吉甫猶通稱或者亦以字爲重歟陸務觀筆記字所以表其人之德故傳者謂夫子曰仲尼非姬也先左丞每言及荆公只曰介甫蘇季明書張橫渠事亦只曰子厚左丞謂農師也鶴山魏氏尤信此說其記常熟縣學有曰昔柳宗元謂論語所載弟子必以字惟曾子有子不字遂謂是書出於曾門蓋以字輕而子重也及考諸孔門之訓則字爲至貴蓋字與子皆得兼稱如門人之於孔子進而稱子不敢退而稱仲尼不言子其次亦有既子且字如閔子騫等不一二人或字者又數人然淵弓至游夏最號爲高弟子而不得字也有子曾子子而不得字也就二者而論則字爲尊蓋子雖有師道之稱然繫子氏者不過男子之美稱耳故孝經字仲尼而子曾子禮還字仲尼而名言僂至於子思字其祖孟子字其師

之祖相傳至今人之字仲尼者母敢以爲疑字既尊矣則難以孟子亞聖亦不得以字行不寧惟是仲尼作春秋二百四十二年間字而不名者僅十有二人而游夏諸子之門人亦各字其師相承至於漢初猶未敢輕以字許人答張行甫書古人稱字者最不輕儀禮子孫於祖稱皆稱字孔門弟子多謂夫子爲仲尼子思孫也孟子又子思弟子也亦皆稱仲尼至漢魏後只稱仲尼雖今人亦稱之而人不以爲惟游夏之門人皆字其師漢初惟子房一人得稱字中世有字其諸父字其諸祖者近世猶有後學呼退之兒童誦君實者今日胡子仁仲張子敬夫朱子元晦是尊敬之至答羅愚書古人以字爲重雖孔子弟子與子思皆呼孔子爲仲尼與諱相似皆人所通稱也今人呼前輩字遂爲不然題韓氏墓誌後或問先賢可字乎曰若用孔門弟子與子思孟子稱仲尼例則字先賢已過矣凡此俱推稱字爲甚貴洪景廬云論語所記孔子與人語及門弟子并對其人間答皆斥其名未有稱字者雖顏冉高弟亦曰曰曰曰曰唯至閔子獨云子騫終此書無損名昔賢謂論語出於曾子有子之門人予意亦出於閔氏觀所言閔子侍側之記與冉有子貢子路不同則可見矣其說正魏氏所謂游夏之門人各字其師者也周益公疑無已作王平父集序字歐公至子固則曰南豐先生無已何尊焉至於傳道之師則不可以不別是知其字爲天下通稱若不逮所尊而尊之者特別其師養之私敬無以過於字也蓋參古今而論則臨文記事尊者稱之以字非不敬也應對之頃書疏之間則字於其朋友從曰

氏說可也世俗去古遠徒知不可以字而更以號稱猶未可也況不惟尊其不可字者如此故雜記之冀來者識字之所以貴也夫

明道雜誌杜甫之父名閑而甫詩不諱閑某在館中時同舍屢論及此余謂甫天姿篤於忠孝於父名非不獲已宜不忍言試問王仲至討論之果得其由大抵本誤也寒食詩云田父邀皆去鄰家閑不違仲至家有古寫本杜詩作問不違作問實勝閑又諸將詩云見愁汗馬西戎逼會閑朱旆北斗閑寫本作殷字亦有理語更雄健又娟娟戲蝶過閑幔片片驚鷗下急湍本作開幔開幔語更工因閑幔見蝶過也惟韓幹畫馬贊有御閑敏寫本無異說離客是閑敏而禮卒哭乃諱馬贊客是父在所為也

螢雪叢說今人生子妄自尊大多取文武富貴四字為名不以希顏為名則以望回為名不以次韓為名則以齊愈為名甚可笑也古者命名多自貶損或曰愚或曰魯或曰拙或曰賤皆取謙抑之義也如司馬氏幼字大子至有慕名野狗何嘗擇稱呼之美哉嘗觀進士同年錄江南人習尚機巧故其小名多是好字足見自高之心江北人大體任真故其小名多非佳字足見自貶之意若夫鴈塔之題當先正名垂於不朽

兼明書隱四年衛州吁殺其君完即桓公也諸侯讀皆如字明日非也完當作兒何以知之夫名以昭實終將諱之故既葬而為諡若衛侯名完豈得諡之桓乎故知完當作兒按字書容貌之兒從白下八俗書完作兒與容貌之貌相似是桓公本名兒傳寫誤為

完也

避暑錄話揚子雲謂嚴君平為蜀狂避武帝之諱也其稱李仲元蓋與君平為一等人班固作王吉傳序載君平與鄭子真事甚詳而不及仲元顏師古以二輔決錄君平名遵子真名模余讀蜀志泰必與王商書論嚴君平李弘立祠事曰李仲元不遵法言令名必淪又以知仲元蓋名弘但惜其行事不著爾

今人謂賤丈夫曰漢子蓋始於北齊魏愷自散騎常侍遷青州長史固辭之宣帝大怒曰何物漢子與官不就此其証也承平日有宗室名宗漢者自惡人犯其名謂漢子曰兵士舉官皆然其妻供羅漢其子授漢書官中人曰今日夫人名僧供十八大阿羅漢士大保請官教點兵士書都下聞然傳以為笑

仁宗賜宗室名太祖下曰世太宗下曰仲秦王下曰叔皆兄弟行世即長也其後世子之曾孫又曰伯則失之

司馬侍郎村陷鹵後妾生一子於燕名之曰通國實取蘇武胡婦所生子之名名之而國史不書其末亦諱之

錢鏐字穆范祖禹字淳皆一字交友以其難呼故增父字非其本也

周宇文護與母閭書曰受形稟氣皆知母子誰知陸保如此不孝此乃對母自稱小名南齊武帝崩鬱林王即位明帝謀廢立右僕射王晏盡力助之從弟思遠謂晏曰兄荷武帝厚恩一旦贊人如此事何以自立因勸之引決及晏拜驃騎謂思遠兄思微曰陸昌之末阿戎勸吾自裁若用其語豈有今日思遠曰如

阿戎所見猶未晚也此乃對兄自稱小名畢景儒幕府燕閒錄載蘇易簡初及第時與母書自稱峨峨亦小名也從伯父右司小名馬哥在京師省祖母楚國夫人出上馬矣楚國偶有所問自出屏後呼馬哥親事官問之自伯父曰夫人請吏部蓋此輩亦習聞之也今吳人子弟稍長便不欲人呼其小名雖尊者亦以行第呼之矣風俗日薄如此奈何

王荆公父名益故其所著字說無益字蘇東坡祖名序故為人作序用敬字皆又以為未安遂改作引而謂字序曰半說張若叟父名蓋故表中云此乃伏遇皇帝陛下今人或效之非也

近世名士李泰發光一字泰定冕以道說之一字伯以潘義學其賞一字子賤張全具守一字子固周子充必大一字洪道西園器燁一字仲蒙林黃中栗一字寬大宋元駒嘉一字仲晦人稱之多以舊字其作文題名之類必從後字後世殆以疑矣

祥符中有布衣林虎上書真廟曰此人姓林名虎必尚怪者也罷遣之宣和中有林虎者賜對徽宗亦異之賜名於虎上加竹然字書初無此字乃自稱琅玕之虎而書名不敢增但作虎云

東齋記事歐陽公集古錄目楊震碑陰題名跋云此碑所書河間賈伯鎔博陵劉顯祖之類凡百九十八疑其所書皆是字爾蓋後漢時見於史傳者未嘗有名兩字者也予按前漢書王莽傳王莽秉政令中國不得有二人因使使者以鳳單于宜上書慕化為一名漢必加重賞單于從之上書言幸得備藩臣竊樂太平聖制臣故名襄知牙斯今謹更名曰知莽大悅

曰太后遣使者各諭厚賞賜焉當并特故有禁既光武即位以來士大夫相循襲復名者極少但不可謂無也藏不章字公先有傳附於蘇章傳後孔傳二子曰長彦季彦又有劉駒魯營與劉珍校定東觀書謝承漢書有云中丘李智名靈彦郭太傅有張孝仲范特祖名公子許爲康司馬成此數人者出於蜀牧置郵屠沽卒伍洪非以字行者其爲名無可疑如此之類見於書傳中今可攷也

能改齋漫錄錄其子名晉餘見司馬彪注莊子於它書不見易牙名坐易牙其字也見孔頴達左傳疏

東軒筆錄秦始皇帝諱政至今呼正月爲征月爲趙避石勒諱至今改羅勒爲蘭香朱高祖父名誠至今京師呼城外有州東州西州南州北而韋城相城胙城等縣但呼韋縣相縣胙縣是也

癸辛雜識山陰之亭其扁乃靖康中箕山王俱書士辰歲全楚卿拾天章寺旁席田爲蘭亭書院其扁乃康訪分司王俱書之二百年間同姓同名可謂異矣葉亦愚之右丞相也李漸泉班通書題街云門生中率大矣福建道宣慰使班蓋徑去自己之姓以避其名其苟賤不足道如此漸泉在前朝爲省元爲從官爲督府參謀所予如此宋安得不亡

余近見先朝太祖太宗時朝廷進呈文字往往只押字而不書名初疑爲檢底而末乃有御書批殊不能曉後見前輩所載乾淳間禮部有中祕省狀押字而不書名者或者以爲相輕致憾范石湖聞之笑其陋云古人押字謂之花押印是用名字稍花之如韋勝五朵雲是也豈惟是前輩簡帖亦止是前面書名其

後押字雖刺字亦是前是姓某起居其後亦是押字士大夫不用押字代名方是百餘年事爾福王長子小字祐孫即不子生次日黃氏所生小字德即紹陵也蓋取並立人二字後乃應德祐之號枕譜晉書謝安傳謝元北伐侍堅下遂云安與元圍基元上去一張字讀者知爲何元耶按張元與謝元同名入號南北二元

羣碎錄司馬遷父名談故史記無談字李希傳趙談改名同范購父名泰故後漢書無泰字故郭泰鄭泰皆改作太今人與父同名者改曰同本此

君平子陵皆莊姓東漢避顯宗諱遂易莊爲嚴如宣帝諱苟改荀卿爲孫卿卿名况

杜伯度名操曹魏時避武帝諱故隱操字則知度非名也韓愈諱辯稱杜度誤

尚長字子平范曄尚作向

鮫即鯨字鯨死化爲元魚故合而爲字

祖士稚祖遜字也作士雅者誤

中根史記作中黨家語作中績績即黨後漢王政云無申棠之欲其誤寫無疑今根黨並記是以一人爲二人黨字子周懸直孔子弟子字子象史記作懸豐

閑止宰我與田常作亂夷其族見史記按左氏無宰我與田常作亂之文作亂者乃閑止止字子我字與宰字相似故誤以爲宰我

賢奕魏鶴山云古人稱字者最不輕儀禮子孫子祖

嗣皆稱字孔門諸子多稱仲尼子思孫也孟子子思

弟子也亦稱仲尼游夏之門人皆字其師漢初惟子

房一人得稱字世有字其叔父字其諸祖者近世猶

有後學呼退之兒童誦君實之類今惟平交乃稱字稍尊貴者便不敢以字稱之與古異矣

書蕉陽冰字少溫見於宣和書譜或以爲陽冰即李潮之子

妮古錄高房山清節雅尚有馬先生亦其國人遂號

彥敬蓋司馬慕蘭之意也

蘇子由之子與襄陽家諸米皆字虎兒黃山谷贈以

謝元暉古印者是也後見老米墨跡一帖云吾子鰲

兒洞陽二雄

余有唐伯虎夢草圖一卷全法范寬太原王公跋云

陳仲醇奉其尊公先生之命名長子曰夢蓮次日夢

松皆實夢也獨第三子生時未有夢而偶得是卷仲

醇躍然曰此詎非夢乎今余子爲謝家兄弟續池塘

春草之句不辱此圖已於昨之辰爲援圖命之而囑

予題卷後以代摩頂王錫爵書

見聞錄凡祖諱及名臣與鄉邦先達名字皆當勝帖

壁間恐子孫奴隸有因而相仍者不可不慎

眉公筆記文徵明始名璧徵明其字也後更以爲名昔文文山死宋而其弟文璧號文溪者附元公之改名意或惜此

野客叢談童烏舊說謂揚子雲之子小名有一先輩讀法言謂吾家之童爲一句烏連乎字作嗚呼字讀謂歎聲也似亦理長按後漢鄭固碑曰大男有揚烏之才年七歲而夭蘇頌賦童烏何壽之不將是時去子雲未遠所舉想不謬於是知童烏爲子雲之子小名又觀韓退之作薛公達墓誌集本云以公儀之子爲我後石本作以公儀之子已已後我趙德夫謂已

已蓋其小字金石錄中唐人碑刻最多考其人名姓字與今本傳率多差謬或以字爲名或以名爲字或添減不同似此類十居七八唐距此二三百年姓字顯然著於史策者尚爾不可辨况所謂小名小字者哉此猶暗昧難以稽考南史王詢亦小字童烏

前輩有云前漢有酈食其審食其名字相沿此必慕其爲人如司馬相如慕蔣相如之爲人故亦名相如且名食其者不獨酈審二公也前有司馬食其見戰國策後有趙食其見西漢想酈生輩慕司馬食其爲人故名食其其後趙食其亦必如此人知食其之名自酈審始不知酈審前已有此名者又如前漢有金日磾後漢有馬日磾而晉又有段匹磾魏有于栗磾者

懶真子云漢初去古未遠風俗質略故太上皇無名母媼無姓然唐宰相表叙劉氏所出云太公名端子執嘉生四子伯仲邦交邦即漢高帝也高帝之父漢史不載其名唐史乃載之此事亦可大笑余謂太上皇名已見後漢章帝紀注中不但唐書也章紀注謂名端一名執嘉與唐書所說微異而不注所自蓋出於皇甫謐帝王世紀中不特此也如惠帝張后文帝薄后以至薄父之徒皆有名字而史記漢書本傳初未嘗聞也且太上皇之名母媼之姓不見漢書者史氏不載耳馬永卿謂風俗質略上皇無名母媼無姓此說失矣

世說云謝太傅語真長阿齡於此事故欲大厲注阿齡王胡之小字余謂胡之本字修齡呼阿齡者即其字耳非小字也猶桓公呼殷源爲阿源王處仲呼王

平子爲阿平之類也阿之一字顧所施用有綴以姓者有綴以名者有綴以字者有綴以第行者綴以姓如阿阮綴以名如阿戎綴以字如阿平綴以第行如阿大詎可因其稱阿遂以爲小字乎

淮南子曰神農嘗百草滋味一日而遇七十毒世紀曰伏羲嘗和百藥淮南子曰炎帝王於火死而爲審神事始曰竈黃帝所置古史考亦曰黃帝始造釜甑火食之道就矣漢臨江王傳注謂黃帝子曼好遠遊死於道故後人以爲行神漢馬氏傳注則曰其工氏子修好遠遊故祀以爲祖神河圖曰河伯姓呂名公子夫人姓馮名夷聖賢家纂記亦曰馮夷者弘農華陰隄首人服八石得爲水仙爲河伯婦一說又謂河伯乘兩龍一曰水夷二曰馮夷史記相如傳注則又曰馮夷河伯字也山海經曰東海中有度朔山上有二神一曰神荼二曰鬱壘風俗通亦曰黃帝時有神荼鬱壘兄弟二人性能執鬼故東京賦曰守以鬱壘神荼副焉括地圖曰度朔山尖桃樹下有二神一名鬱一一名鬱壘高誘注戰國策則又曰一曰余與一曰鬱雷其紛紜如此殆不可曉書籍間人物名字不同似此之類甚多

世謂晉字合從氏今有從氏者避太宗諱故隋觀唐三藏聖教序正太宗所作褚遂良書其間重昏之夜則從民初未嘗改民以從氏也謂避諱之說謬矣蓋俗書則然又觀溫彥博墓志貞觀間歐陽詢書其後言民部尚書唐儉云云當太宗時正字且不諱而况所謂偏旁乎又有以見太宗不諱之德

筆談云景祐中審刑院斷獄有使臣何次公具獄王

判官方進呈上忽曰此人名次公何義王判官不能對是時龐壯敏公爲殿中丞審刑院評議官從長官上殿乃越次對曰臣嘗讀前漢書黃霸字次公蓋以霸次王也此人名慕霸之爲人上領之僕謂龐證既迂其說無義不若曰臣讀漢書蓋寬饒字次公寬饒丞相所謂次公醒而狂者是也寬饒爲人公廉鯁直無所回避此人必慕寬饒之爲人此說爲得且前漢書所載四次公又有張次公桓次公者奚獨霸故莊敏想倉卒之間偶記得黃霸字次公故以爲對耳僕考漢人字次公之意爲其兄弟間居其次者如云仲卿次君耳龐謂霸次王變矣王壺清語載此事謂梁適與曾漫錄載此不辨所以但謂非適云云

今史文用承准字合書準說者謂因寇公嘗國人避其諱遂去十字只書準考魏管石本史文多書此承准字又觀秦漢間書與夫隸刻平準多作准知此體古矣于祿書廣韻注謂准俗準字既古有是體不可謂俗書要皆通用石林燕語言京師舊有平準務自漢以來有是名蔡魯公爲相以其父名準改爲平貨務余謂平準字自古以來更革不一觀宋書平準令避順帝諱改曰染署其他言準字處所避可知

唐詩中多用張長公事如陳子昂詩曰世道不相容嗟嗟張長公此蓋言張釋之子耳釋之子名摯字長公區而不仕見推於時據南史又有一張長公備文帝開文德省置學士以吳郡張長公典虞肩吾充其選陳宣亦曰昔吳國張長公號酒年六十自言引滿大勝少年時是則有兩張長公矣長公者猶言長卿長君耳前漢人語大率多用君卿公翁子伯叔孟仲

季長次幼少稱此十五字有兄弟者往往以孟仲季長次幼等字爲次第如張釋之字季其兄字仲計必有長兄字孟或伯者鄭弘字稚卿兄昌字大卿計必有長兄字長卿者杜延年字幼公攻世系杜延年有二兄延壽延考而不著其字以幼公字推之計其二兄必字長公次公此理明甚張長公之名自陶淵明發之

容齋隨筆曰李陵詩獨有盈尊酒與子結綢繆盈字正惠帝諱漢法觸諱者有罪不應敢用此語僕觀古文苑所載枚乘柳賦曰盈玉纁之清酒又玉臺新詠枚乘新詩曰盈盈一水間梁簡通問孫文範所書茅君碑謂大元具君諱盈漢景帝中元間人觀此二事知惠帝之諱在當時蓋有不諱者然又怪之當時文字間或用此字出適然猶爲有說至以廟諱爲名甚不可曉

軀不軀錄今上初重張江陵於御札不名以復傳旨批奏亦多不名而羣臣更附之至於章疏亦不敢斥名第稱元輔而已夫子之於父尚猶君前臣名故樂職御管使而叱曰書退此禮也江陵沒餘威尚有言官奏事欲仍稱元輔則礙新執政張蒲坂乃曰張太師至有稱先太師者蓋未幾而穢言無所不至矣故事投刺通書于東面皆書一正字雖甚不雅亦不知所由來而承傳已久余自癸酉起官兄書牘以指閣紅紙帖其上問書啓字而丙子入朝投刺俱不書正字矣初亦以爲雅既而問之知其避江陵諱也太平清語顧况結廬茅山昌蒲潭石墨池上年九十卒林肩吾嘗問其字余不能應後查改字道翁

歷史云古人二十而冠父字之今人童而亦字之非古

丹鉛總錄史記注仲雍字熟哉哉字取字僅見此隋人魏覺字雙和崔挺字雙根雙字取字僅見此隋宗室楊綸字斌籍楊溫字弘籍籍字取字僅見此唐登科記韓湘字北渚此又似今人之號亦異矣

高祖時有鄭食其審食其武帝時有趙食其師古皆讀作異基而近代學者鄭則爲異基審則爲食其趙則爲食其誤矣同是人名更無別議也苟悅漢紀三者並異其字

日知錄堯舜禹皆名也古未有號故帝王皆以名紀臨文不諱也胡文定修春秋列子臣問古者不以名者國二帝之名而堯與禹乃虞氏史攷之尚書帝曰格汝桀格汝禹各其臣也堯崩之後舜與其臣言則曰帝禹崩之後五子之歌則曰皇祖引征則曰先王無有言堯舜禹者不敢名其君也自啓至發皆名也夏后氏之季而始有以十干爲號者桀之癸商之報丁報乙報丙主壬主癸皆號以代其名自虎通曰殷質自天乙至辛皆號也

商之王著號不著名而名之見於經者二天乙之名履辛之名受是也武庚亦號曰湯曰紂則亦號也

孔氏西伯也音相亂號則臣子所得而稱故伊尹曰惟尹躬暨湯頌曰武湯曰成湯曰湯孫也乃祖成湯多士言爾先王成湯曰文祖曰文祖曰神宗曰神宗曰烈祖曰高祖曰高后曰中宗曰高宗而廟號起矣曰

元王曰武王而諡立矣曰大舜曰神禹曰大禹曰成湯曰寧王而稱號繁矣自夏以前純乎質故帝王有

名而無號自商以下浸乎文故有名有號而德之盛者有諡以美之於是周公因而制諡自天子達於卿大夫美惡皆有諡而十干之號不立

古人君於其國之卿大夫皆曰伯父謂原繁叔父曰子大夫曰二三子不獨諸侯然也曲禮言列國之大夫入天子之國曰某士自稱曰陪臣某

然而天子接之猶稱其字宣公十六年晉侯使士會平王室王曰季氏而弗聞乎成公三年晉侯使驪朔獻齊捷於周王曰鞏伯實來昭公十五年晉荀躒如周葬穆后籍談爲介王曰伯氏諸侯皆有以鎮撫王

室注疏伯氏又曰叔氏而忘諸乎注叔氏周德雖衰辭不失舊此其稱字必先王之制也春秋凡命諸者皆稱字周公作立政之書若侯國之司徒司馬司空亞旅並列於王官之後蓋古之人君恭以接下而不敢遺小國之臣故平平左右亦是率從而成上下之交矣

史記漢高帝時有兩韓信則別之曰韓王信漢書王莽時有兩劉歆則別之曰國師劉歆此其法本於春秋左氏傳襄公二十五年齊崔杼弑其君光事中有兩賈舉則別之曰侍人賈舉

丁外人非名言是蓋主之外夫也猶言齊悼惠王肥高帝外婦之子也服虔曰外人主之所幸也然王子侯表有山原孝侯外人齊孝王五世孫乘丘侯外人中山靖王曾孫則是姓劉而名外人不知何所取義也

呂氏春秋言秦穆公典師以襲鄭過周而東鄭賈人弦高奚施將西市於周遽使奚施歸告乃矯鄭伯之命以十二牛勞師是奚施爲弦高之友而左氏傳不

載淮南子言荆軻西刺秦王高漸離宋意爲擊筑而歌於易水之上宋玉笛賦亦以荆卿宋意並稱是宋意爲高漸離之侶而戰國策史記不載

戰國策東孟之會聶政陽堅刺相兼君注云堅政之副猶秦武陽按聶政告嚴仲子曰其勢不可以多人未必有副淮南子注秦皇帝二十六年初兼天下有長人見於臨洮其高五丈足跡六尺做寫其形鑄金人以象之翁仲君何是也今人但言翁仲不言君何孟子禹稷當平世三過其門而不入攷之書曰啓呱呱而泣予弗子此禹事也而稷亦因之以受名華周杞梁之妻善哭其夫而變國俗攷之列女傳曰哭於城下七日而城爲之崩此杞梁妻事也而華周妻亦因之以受名

墨子文王舉閼天泰顛於罍網之中授之政而西王服於傳未有此事必太公之誤也呂氏春秋箕子窮於商范蠡流乎江范蠡未嘗流江必伍員之誤也史記孫叔敖三得相而不喜二去相而不悔孫叔敖未聞去相必令尹子文之誤也淮南子吳起張儀車裂支解張儀未嘗車裂必蘇秦之誤也易林貞貞得願微子解囚微子未嘗被囚必箕子之誤也晉潘岳太宰魯武公誅秦亡蹇叔春者不相蹇叔之亡不見於書必百里之誤也

後魏穆子容太公呂望碑文大魏東包碣石西跨流沙南極班超之柱北窮實憲之誌班超未嘗南征必馬援之誤也後周庾信擬詠懷詩麟窮季氏置虎振周王園季氏未嘗獲麟必叔孫之誤也

晉書夏統傳子路見夏南憤志而恍惚子路未嘗見夏南蓋衛南子之誤

晉侯重耳之名見於經而定四年祝佗述踐土之盟其載書止曰晉重耳古人二名可但稱其一與昭二年莒展與出奔吳傳曰莒展之不立晉謂曹伯僑稱叔振鐸爲先君叔振亦二名而稱其一也

昭二十一年蔡侯朱出奔楚穀梁傳作蔡侯朱出奔楚乃爲之說曰東者東國也何爲謂之東也王父誘而殺焉父執而用焉奔而又奔之曰東惡之而貶之也然則以削其一名爲貶也

王莽孫宗得罪自殺復其本名會宗貶厥爵改厥號是又以增其一名爲貶也

班固幽通賦發還師以成命今重醉行而自稱潘岳西征賦重幾帶以定襄弘大順以霸世文公名止用一字本於賤土載書却非翦截古人名字之比至岳爲關中詩云紛紛齊萬亦孔之醜馬汧督謀云齊萬

嗟閼震驚台司則不通矣豈有以齊萬年爲齊萬者邪若梁王形爲征西大將軍而詩云桓桓梁征尤不成語

巨滔天而派夏王莽字巨君止用一巨字王遵九思管束縛今桎梏百貿易今傳賣遺桓總今識卑才德用今列施百里奚止用一百字此體後漢人已開之矣

呂氏春秋干木光乎德去段字惜耆來革順志而用國去惡字此爲翦截名字之祖

文中並稱兩人而一氏一名尤爲變體杞植華還一人也而淮南子稱爲殖華賈誼新書使曹勃不能制

曹曹參勃周勃也史記孟荀卿傳管嬰不及管仲嬰嬰嬰也司馬遷報任安書周魏見辛周周勃魏魏其侯實嬰也楊雄長楊賦乃命驍衛驍驍將軍霍去病衛大將軍衛青也杜欽傳覽宗室之嬰國韋昭曰宗殷高宗也宣周宣王也徐榮傳名何必夏子俗何必成康服虔曰夏禹也子湯也湯子姓班固幽通賦周賈誼而賈情周莊周賈誼也漢序彭長碑

云喪父事母有榮顯之行榮高榮顯考叔也夏侯湛張平子碑云同貫實宰宰我貢子貢也風俗通清擬夷叔卻正釋議福夷叔之高懸傳子夷叔迂武王以成名杜預遺令南觀伊雒北望夷叔陶潛詩積善云有報夷叔在西山皆謂伯夷叔齊漢廣漢漢國侯李胡神夷史之高巴郡太守樊敏碑有夷史之直

皆謂伯夷史魚陶潛讀史述九章程杵是程嬰公孫杵臼新唐書尉遲敬德傳隱舉是隱太子巢刺王一證一辭

子孫得稱祖父之字子稱父字屈原之言朕皇考曰伯庸是也孫稱祖字子思之言仲尼祖述堯舜是也

儀禮筮室之辭曰哀子某爲其父某甫筮室又曰哀子某來日某卜葬其父某甫字父也虞祭之祝曰通爾呈祖某甫宰與之祝曰哀子某來日某隳爾爾于爾呈祖某甫字祖也附祭之祝曰通爾呈祖某甫以隳爾爾孫某甫兩字之也

字爲臣子所得而稱故周公追王其祖曰王季王而

開府元龜唐憲宗元和元年禮儀使奏言謹按禮記

兼字